



17. august 2012

UKA 2012/25

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Naartuersittarneq pillugu inatsit nr. 232, 12. juni 1975-imeersup taartigisinnaasaanik maleruagassioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaaliornikkut Naartuersittarneq pillugu Naammagittaalliuteqartarfiup inuttalersugaaneranut tunngatillugu aalajangersakkat nutarteriffigineqarsinnaaniassammata.

(Inatsisartunut ilaasortaq Olga P. Berthelsen, Inuit Ataqatigiit)

Tunngavilersuut

Naartuersittarneq pillugu Kalaallit Nunaanut inatsit 1975-imeersuuvoq, tassalu Namminersornerulersimaneq kingornalu Namminersorneq sioqqullugilli inatsisiliaalluni.

Tamanna inatsimmi § 4, imm. 3-mi, 2.-3.pkt-imi oqaaseqatigiinnik imaattunik takussutis-sartaqarpoq:

“Assuarliutinik suliaqartussat tassaapput landshøvdinge, landslæge aamma suliffissaqartit-siniarnermi ikiuisarnermilu direktøri taavalu ilaasortaq landsrådimit toqqarneqartoq Nuummi najugaqartuusussaq. Ilaasortap kingulliulluni taaneqartup sinniisussaannik aamma Nuummi najugaqartuusussamik landsrådi toqqaassaaq.”

Inatsit taaneqareersutut pisoqalitsersimavoq taamaattumillu aamma nutartertariaqarluni. Ilanngullugu aamma isumaqarpunga Naartuersittarneq pillugu Naammagittaalliuteqartarfimmi politikerinik ilaasortaqartitsiuarmissaq ullutsinnut naleqqukkunnaartoq, tunngaviumimmi isumaqarluinnarpunga Naartuersittarneq pillugu Naammagittaalliuteqartarfimmi ilaasortaasariaqartut suliamut ilinniarsimasut. Assersuutigiinnarlugu tassani politikerit ilaasortaasariaqanngillat.

Naartuersissinnaanissaq arnanut kikkunnulluunnit periarfissaalluni pisinnaatitaaffiuvoq taamaattumillu inummut namminermut tunngalluinnartuulluni. Naartuersittarnerli inatsimmi piumasarineqartut naapertorlugit aamma nakorsat aalajangiinnerannik tunngaveqarluni pisinnaavoq. Pisumiit pisumut pissutsit apeqqutaatillugit taamaamat aamma etikkimut/ileqqorissarnissamut tunngassuteqartut isumaliutigeqqissaarneqartariaqartassapput, taamaattoqartillugulu naleqquttuosorinangilaq tamanna politikerit aamma akuuffigigunikku. Taamaamat Nunatsinni napparsimaveqarfimmi passunneqartartunut tunngatillugu aamma isumaliutersuutigeqqunarpoq etikkimut/ileqqorissaarnissamut tunngassuteqartunut oqaaseqartartussanik siunissami arlaannaanulluunniit attuumassuteqanngitsunik pilersitsissanersugut, Ileqqorissaarneq pillugu Siunnersuisoqatigiinnik/Etisk Råd-imik taaguuserneqartumik.

Oqaatigineqassaaq qanga Landsråd-iusimasoq, aamma Inatsisartut/Landstingiusimasut kingornalu Inatsisartut maannamut Naammagittaalliuteqartarfimmut ilaasortassamik toqqaasussaataasimammata, tamannali oqaatigineqareersutut ullutsinnut naleqqukkunnaarsorinarpoq.

Pisortanut aningaasatigut allaffissornikkullu kingunerisassat

Aningaasaliissutaareersimasut iluini inatsimmik nuterterisinnaaneq ilimagineqarpoq.

Namminersorluni inuussutissarsiuteqartunut aningaasatigut allaffissornikkullu kingunerisassat

Kingunerisinnaasaanik soqanngilaq

Innuttaasunut aningaasatigut allaffissornikkullu kingunerisassat

Kingunerisinnaasaanik soqanngilaq